



PARLAMENTO
NACIONAL
República Democrática de Timor-Leste

Gabinete do Presidente

Komunikadu ba Imprensa

Haktuir Jornal Independente iha loron 20, fulan Fevereiro, tinan 2018, ho nia Títulu, "**Sosiedade Sivil Husu Kansela Saláriu Deputadu 36**", hare ba kestaun ida ne'e hanesan Prezidenti Parlamentu Nasionál hato'o katak tuir Konstituisaun da Repúblika, iha artigo 100, número 2, katak; Disolusaun Parlamentu Nasionál nian la hamate mandatu Deputadu sira nian nebe mantém to Parlamentu ka Lejislatura foun nian reuniaun ba dahuluk.

Manutensaun ba mandato ne'e signifika katak Deputadu sira la lakon sira-nia direito, inklui saláriu. Desizaun ruma hodi hapara sira-nia saláriu no subsidu sira seluk mak sei mosu fali violasaun ba lei.

Hanesan señor peskizadór Asia Justice and Right hatete presiza lei ida atu regula konaba remunerasaun Deputadu sira nian durante Disolusaun.

Buat ida mak ita tenke konsidera wainhira ko'alia konaba asuntu ne'e, maka disolusaun la'os fenomenu polítiku-jurídiku ida ne'be mosu be-beik. Hafoin liu tiha tinan 15 mak disolusaun mosuba dala uluk. Konsiderasaun seluk tan liga ba tempu entre disolusaun no eleisaun antesipada. Maske agora dadaun tempo ne'e naruk uituan, maibe bainbain iha kuaze Nasaun hotu tempo ne'e badak. Hanesan Iha Reino Unido (Inglaterra) loron 20, iha Portugal no Cabo Verde la bele liu loron 60. Ba iha futuru, wainhira ita nia administrasaun eleitorál maduro liu tan, mak ita bele konsidera tau limiti másimu ka prazu másimu ba eleisaun antesipada, hanesan por ezemplu fulan rua sura husi loron disolusaun. Hanesan ne'e salariu deputadu sira la sai preokupasaun bo'ot.

Aproveita mos iha komunikadu ida-ne'e atu esklarese katak, whainhira ita koalia konaba Komisaun Parmanenti, funksionamentu órgaun ida-ne'e laos buat foun. Komisaun Permanenti funksiona laos deit durante disolusaun maibe durante resesu Parlamentu nian, ne'ebe akontese kada tinan, durante fulan rua (15 jullu to'o 14 setembru). Durante resesu Deputadu kontinua simu saláriu.

Iha parte seluk, se'es uituan husi asuntu komunikadu ida ne'e, hakarak hatete katak ita iha ona experiénsia barak konaba paralizasaun atividade Parlamentu, nebe akontese iha período resesu, no funksionamentu Komisaun Permanenti nian. Experiénsia ida-ne'e, ne'ebe diak tebes, mak ita tenke uza hanesan sasukat konaba lalaok Komisaun Permanenti durante disolusaun. Se durante resesu Parlamentu, iha tinan 15 nia laran, Komisaun Permanenti kuaze nunka konvoka reuniaun

plenária, komisaun espesializada sira para sira nia atividades hotu, hanusá mak ita bele defende katak iha disolusaun, ne'ebe forte liu duké resesu, tamba disolusaun hakotu lejislatura, komisaun sira tenke servisu hanesan bainbain no Plenáriu bele konvoka bebeik. Ho nune'e la iha fatin para funksionamentu Parlamentu, komisaun sira no Komisaun Permanenti sai polémika bo'ot entre bankada sira no mos iha komidade nia le'et.

Fila fali ba asuntu salariu no subsidiu Deputadu durante disolusaun ami uza biban ida ne'e hodi konvida sosiedade sivíl atu hanoin no hato'o submisaun ruma iha Lejislatura tuir mai konaba alterasaun Lei ba Estatutu Deputadu sira, hodi hatama asuntu ida-ne'e. Ne'e mak bele sai kontribuisaun diak ida husi sosiedade sivíl ba iha polítika boa governasaun no Justisa Sosial.

Maibe hatete katak Deputadu nebe la tama iha Komisaun Permanenti sira nia estatutu lalos ka ilegál, no wainhira sira simu saláriu ne'e krime ida ou abuzu de poder, ne'e lalós. Opiniaun sira hanesan ne'e la kontribui ba esklaresimentu opiniaun públiku nian, ida ne'e lohi ema no aumenta tan konfusaun iha ema nia kakutak.